

Канон пред иконой Пресвятой Богородицы «Нечаянная Радость»

Память празднуем 9 (22) декабря

Тропарь, глас 4-й

Днесь, вѣрнии людіе, духóвно торжествуем, прославляюще Застѹпницу Усѣрдную рóда христіанскаго, и, притекающе к пречістому Ея образу, взываем сїце: о Премілоствивая Владычице Богородице, подаждь нам нечаянную радость, обременѣнным грехи и скорбьми многими, и избави нас от всякаго зла, молящи Сына Твоего, Христа Бога нашего, спасти души наша.

Канон

Глас 4-й

Песнь 1

Ирмос: Отвѣрзу уста моя, и наполнятся Духа, и слово отрыгну Царице Матери, и явлюся, светло торжествуя, и воспою, радуясь, Тя чудеса.

Припев: Пресвятая Богородице, спаси нас.

Отвѣрзшая двѣри милосердія Божия архангельское привѣтствие Тебѣ приносившему, не затвори и от нас утробы человеколюбія Твоего, Тя воспевающих.

Пресвятая Богородице, спаси нас.

Чудно бысть житіе Твое на земли, Преславная Мати Дѣво, но Небесное Твое жительство чуднейше есть: непрестанно бо являеши чудеса матерняго Твоего милосердія Тя воспевающим.

Слава: Сына, от Отца безлѣтно раждающагося в послѣдняя лѣта, зачала еси осенением Духа Святаго,

вѣчную радость міру родивши.

И ныне: Радуйся, море, потопившее фараона мысленнаго – діавола. Радуйся, камению, напоивший жаждущих жизни духовныя, даровала бо еси роду человеческому Избавителя плененных и Наставника заблуждших.

Песнь 3

Ирмос: Твоя песнословцы, Богородице, Живый и Независтный Источниче, лик себе совокупльшия, духовно утверди, в Божественней Твоей славе венцев славы сподоби.

Пресвятая Богородице, спаси нас.

Тя усердно песнословящих утверди в житии добродетельном и Родшагося от Тебе усердно моли, да не лишени будем венцев славы грех ради наших.

Пресвятая Богородице, спаси нас.

Паче всякаго беззаконна человека в житии своем Сына Твоего грехи прогневаем, но, о Мати Милосердая, буди о нас Ходатаица.

Слава: Да сподобит нас венцев славы в Божественней Своей славе седяй со Отцем и Святым Духом Иисус Человеколюбец, рождейся от Тебе и власть имеяй человеком оставляти грехи.

И ныне: Радуйся, Дево, невместимаго Бога во чреве вместившая, и Того яко Младенца носившая, и сосцы Твоими питавшая.

Господи, помилуй (*трижды*). Слава, и ныне:

Седален, глас 5-й

Теплая Предстательнице и непобедимая, упование известное и непостыдное, стено, и покрове, и пристанище прибегающим к Тебе, Приснодево Чистая, Сына Твоего и Бога моли со Ангелы умирение дати миру, и спасение, и велию милость.

Песнь 4

Ирмос: Седяй в Славе на Престоле Божества во облаце легце,

прииде Исус Пребожественный Нетленною Дланию и спасе зовущия: слава, Христэ, силе Твоей.

Пресвятая Богородице, спаси нас.

Спаса всему миру рождающая, и Самая спасаешь, Мати, от бед и печалей житейских Богородицу Тя исповедующих.

Пресвятая Богородице, спаси нас.

Исцели вся лютыя и неудобь исцельныя болезни наша, Мати Сына и Избавителя, на Крест грехи наша вознесшаго.

Слава: Ипостасная Премудрость, Бог Слово избрала Тя в жилище Свое, Сего усердно моли, да спасет нас имиже весть судьбами.

И ныне: Радуйся, Невесто прекрасная, добрая. Радуйся, Голубице Чистая. Радуйся, Мати Еммануилева, Богородице Приснодево.

Песнь 5

Ирмос: Ужасошася всяческая о Божественной славе Твоей: Ты бо, Неискусобрачная Дево, имела еси во утробе над всеми Бога и родила еси Безлетного Сына, всем воспевающим Тя мир подавающая.

Пресвятая Богородице, спаси нас.

Небо и земля удивляются, зряще милосердие Твое к роду христианскому, преславная Мати Дево, и к самым долу поверженным грешником нисходиши, Всеблагая.

Пресвятая Богородице, спаси нас.

Спаси от зол и скорбей рабы Твоя, Богородице, и мир Божий, превысший всякого мира земного, подаждь рабам, Тя воспевающим.

Слава: Родила еси умиротворившаго Горня и дольня и сего ради на землю Сошедшаго, от Отца же и Духа Святого не разлучившагося.

И ныне: Радуйся, Царице Небес и земли. Радуйся, превысшая Ангел и Архангел. Радуйся, яко Тобою Иаковом предвозвещанный к нам Примиритель сошел есть.

Песнь 6

Ирмос: Божественное сие и всечестное совершающе празднество, Богомудрии, Богоматере, приидите, руками восплещим, от Нея рождаемого Бога славим.

Пресвятая Богородице, спаси нас.

Священное торжество ныне духовно совершающе, приидите, празднующи, воспойм песнями Богоматерь, прославляюще Сына, даровавшего такую благодать Матери Своей.

Пресвятая Богородице, спаси нас.

Призри на пение рабов, Богородительнице, врагов видимых и невидимых смиряя вознесенную гордыню и на смиренные изливая высокие милости Твоя.

Слава: Ты еси корень, от негоже произыде жезл Иессеев, Христос, Человек от дому Давидова и Бог Отцу и Духу Соприсносущный.

И ныне: Радуйся, Мати Обрадованная. Радуйся, прекраснейшая всех дочерей человеческих. Радуйся, благородная отрасль Богоизбранного рода Давидова.

Господи, помилуй (*трижды*). Слава, и ныне:

Кондак, глас 6-й

Не имамы иных помощи, не имамы иных надежды, разве Тебе, Владычице. Ты нам помози, на Тебе надеемся и Тобою хвалимся, Твои бо есмь рабы, да не постыдимся.

Икос

Не ввери мя человеческому предстательству, Пресвятая Владычице, но прими моление раба Твоего: скорбь бо обдержит мя, терпеть не могу демонского стреляния, покрова не имам, ниже где прибегну, окающийся, всегда побеждаемь, и утешения не имам, разве Тебе, Владычице мира. Упование и предстательство верных, не презри моление мое, полезно сотвори.

Песнь 7

Ирмос: Не послужиша твари Богомудрии паче Создавшего, но, огненное прещение мужески поправше, радовахуся, поюще: препетый отец Господь и Бог, благословен еси.

Пресвятая Богородице, спаси нас.

Презрела еси вся красная мира, Чистая, Единому Богу возжелавши послужити, Ему же воспевала еси: отец Боже, благословен еси.

Пресвятая Богородице, спаси нас.

Нас, совершенно благочестивым отроком не последующих, но прилепляющихся твари паче, неже Творцу, настави, Владычице, Единому Богу служити и воспевати: отец Боже, благословен еси.

Слава: Даниил умными очима предузрел Тя, Христе, в камени нерукосечнем, разрушившем суетная царства человеческая, во спасение поющих Тебе со Отцем и Духом: отец Боже, благословен еси.

И ныне: Радуйся, Горю, благодатию Божиею приосененная, от неяже отсечется камень, Богом Отцем положенный во главу угла Церкви Своей, Христос, Ему же поем: отец Боже, благословен еси.

Песнь 8

Ирмос: Отроки благочестивыя в пещи Рождество Богородичо спасло есть; тогда убо образуемое, ныне же действующее, вселенную всю воздвизает пети Тебе: Господа пойте, дела, и превозносите Его во вся веки.

Пресвятая Богородице, спаси нас.

Слыши, Отроковице Дево Чистая, глагол, Гавриилом Тебе вещанный: родиши Сына, спасающего воспевающих: Господа пойте, дела, и превозносите Его во вся веки.

Пресвятая Богородице, спаси нас.

Плотию от Тебе происшедый спасл есть от огня отроков, верою зревших Его. Того моли и нас спасти, пламенем страстей жегомых, Сыну же Твоему воспевающих: Господа пойте, дела, и превозносите Его во вся веки.

Слава: В пещи Вавилонстей виден был еси, Христе, яко Ангел светоносный, зраком же Сыну Божию подобный. Тебе со Отцем и Духом поем: Господа пойте, дела, и превозносите Его во вся веки.

И ныне: Радуйся, купино, Моисеем виденная, в последняя же лета от корене Давидова происшедшая и Спаса всех неизреченно рождающая, Ему же поем: Господа пойте, дела, и превозносите Его во вся веки.

Песнь 9

Ирмос: Всяк земнородный да възиграется, Духом просвещаемь, да торжествует же Безплотных умов естество, почитающее священное торжество Богоматере, и да вопиет: радуйся, Всеблаженная Богородице, Чистая Приснодево.

Пресвятая Богородице, спаси нас.

Бог, от Тебе воплотивыйся и к нам пришедый, содела чрево Твое Небес пространнейше. Дивное чудо: Невместимый во утробу Девы вмещается, да Сию поем во вся веки.

Пресвятая Богородице, спаси нас.

Неизреченно в последняя лета от Тебе Заченшагося моли, Богородице Дево, вся наша печали на радость преложити и света невечерняго нас сподобити, да Сию поем во вся веки.

Слава: Ты еси Престол славы Божия, Иезекиилем тайно узренный, яко Сына Божия, Отцу и Духу Сопрестольна, во Твою Пречистую утробу восприяла еси и Твоима матерними рукама носила еси.

И ныне: Радуйся, Храме одушевленный, в немже Бог плотию обитает. Радуйся, Кивоте, славою Сына Божия приосененный. Радуйся, Всеблаженная, Богородице Чистая, Приснодево.